

20140.154

20140.154
39.1
:6

德平縣志
六

德平縣志卷之十二

藝文志下

葛端肅公家乘集古法書序

補

邢 侗 子 愿

平昌葛幼明氏以所業先端肅公家集諸石跡小子侗侗沐手受歛衿閱之竟作而歎曰是何異躋二華峯巖而茫昧其丈尋涉四溟浩渺而微忼其涯際也粵白結繩代邈文字漸興古文春矣籀篆夏秋隸正冬矣草行餘閏廼是知刀流漆乃根柢之陳行墨吮毫為跗萼之燦逮夫語言熾則紀著滋多體度繁則札行浸盛無論聖作明述紛然鏤金猶鑿鼎之遺規鐫礎仍闕珉之往制以故高門大姓孝子慈孫妄殫力于不刊詭競心于

德平縣志

卷十二 藝文

天成謙記南紙店代印

濟南城內芙蓉街路西

哲匠厥亦滔滔皆是涇渭靡分矣第識鑑昏則甄收弗愜搜剔寡則隳括未周狗好則波濫已東泥遠則木龍猶寓化裁通變夫豈無徒我幼明氏博擅三倉智淹六故每致慨于韋成念祖未及誌諸幽壘孫相紀思僅有賴于來宰填胸赤貌希步素風生活丹青豈異人任而乃聿追王父顯册高文羽已籙于三公袞復華于兩字懃遺一老寶誅孔之王言附驥千秋徵傳夷于朋輩隻詞片語塵牘網編逸同拾瀋之艱精擬揀金之密目標懸帳蹙竭臨池以為不石不堅不古不雅爰採名賢之妙蹟用光吾祖之彝章蓋自祖乙姬文嬴秦炎漢魏乃冠之鍾傅晉則斷自王羲雜粹六朝以瀕隋季唐則多其付授宋亦輯其偏長

下迨胡元不乖餘系一人數紙則紙紙揖其風流一代數碑則碑碑攝其神駿亦有潦痕駁蝕富蘚爛斑縑夫萬軌之淵梯士千尋之壁諸求印可備極體裁是役也筆花霏拂若晉子敬之掃白書丹理郭填即蜀知徵之勒純化蓋吉光萬羽而集爲重裘略無羽跡豫章千材而構爲大廈疇見材端祠廡周遭孟檠交映景襄鐘鈕陋鼓鑄之未工饗饗亞形較歎識之粗備方斯盡美所謂秋壇之絕致孝子之傑思也侗閒與幼明言明盛以來觚翰之長羣騷江左碑版之富亦首金閭似汎支流未窮本始夫伯喈陳留占籍孟皇安定爲鄉茂先著于范陽肩吾奮于新野柳諫生于京兆蕭即望于蘭陵鍾傅王羲瑯琊潁水舉世德平縣志

卷十一 藝文

一

天成謙記南紙店代印
濟南城內芙蓉街路西

所知已唯是介碣豐螭瑰篇偉製羽傳北地滲漉我人偶覩黃河一曲文豹一斑而謂崑崙爲南發之源澤霧非西鍾之秀斯則不達之甚也從此平昌以幼明大矣幼明用中原幟矣他出數娑再見漢唐之世齋堂半畝足當翰墨之林義夙出于賢尊暉生綈裘勞未經于令弟緒就木天蓋坐而論道維端肅公作而行之則幼明氏繫云吳叟工備刮摩有其舉之厥在周禮孔子曰美哉璵璠遠而望之煥如也近而視之瑟如也其以喻茲石也侗也尋丈測岩堯徒勤仰止際涯窺浩渺祇切望洋斯石斯人保諸無斁而已

書院規約

張學文

學之有規非古也古者教士於學曰德曰行曰藝其端各六羣而聚之使之相觀而善又有縞收端皞綦備之飾以肅其容璜琮琚瑀夏齊和鸞之節以養其心天官地志兵機律歷之詳且備以聚其精神深其歲月優之游之使自得之未嘗有條教束縛之苦自聖學廢而知者立異愚者懵焉強者爭奇弱者畫焉或睢囁談諧以飾俗或絺章繪句以干名一二主持名教有心世道者不得已而設之約立以程庶潔清自好之士有所範而不踰其閑有所繩而不軼乎規故子朱子白鹿條約及滄洲精舍之諭一洗浴師之陋亦猶行古之道也夫時有升降道無古今不農不商若何而爲士非老非釋若何而爲儒清夜自思極

德平縣志

卷十二 藝文

三

天成謙記南紙店代印

濟南城內芙蓉街路西

當猛省苦工不負尙破釜以沉舟有志竟成宜臥薪而嘗膽古人之成訓具在先王之良法備存由淺及深循循有自然之規矩擇其尤要者十則以自勗且共相勉云

一端志向 士人束髮受書便當自期遠大旣爲聖賢之徒則盛德大業非異人任識見不可弁鄙志氣不可萎繭一言一事不如古人引爲己恥昔范文正做秀才時便以天下爲己任程明道自成童後即以聖人爲可師王沂公志不在溫飽韓退之望重於斗山遂皆卓然爲一代偉人其志端也須於聖賢路做向上工夫毋於讀書時落魔障境界若搏弋聲明貪襲利祿志斯下矣

一敦倫紀 仁莫大於愛親義莫切於敬長子臣弟友夫子謂爲庸德宗族孝鄉黨弟士之本也大本一失餘無足觀生平所讀何書所學何事倫常之地豈可苟安宜體父母遠到之期無忘昆季厚待之雅以學問報德千古爲心以顯揚承歡寸陰是惜

一慎言動 非禮勿言非禮勿動言寡尤行寡悔言忠信行篤敬童蒙已誦習之易言有物行有恒樞機之發榮辱之主可不慎諸自晉人揮塵風烈動以達者爲高流言毒流不思禮爲我設箕踞而談太極跛躄而讀西銘談誕爲工跣跣爲異其風流可勝道哉甚且有詭誣鄉曲苞苴公門筆墨而兵戎德平縣志

卷十二 藝文

四

天成謙記南紙店代印
濟南城內芙蓉街路西

衣冠而訟獄以視子衿城闕之譏殆有過焉不可玉成甘自瓦裂亟當鳴鼓勿玷宮牆

一變氣質 昔明道使人如坐春風豫章不言而飲人以和與人共立而使人化粹然道德之容斯爲上矣而高明柔克沉潛剛克惟在矯其偏而歸於正果能此道何患愚柔至於朋友尤所宜篤業旣於我晨夕相聚矢以車笠盟之金石其中學有淺深才有高下切磋琢磨正有望於他山之助即臭味偶有差池不妨過從落落彼寥寥餘子之言卿當第一之語非屬標榜即係輕狂不特大雅所譏亦非令終之器

一勤課讀 博學居擇執之先時習尤誦讀之要李守素姓氏

精通名爲人物志虞世南古今淹貫號曰行秘書萬軸千箱
連雲充棟固博雅所不遺惟勤讀乃有益然先後緩急亦自
有分古人謂經史如布帛菽粟諸子百家如別業園林誠確
論也茲倣程子分年讀書之法而變通之寅而起讀書若干
午後閱史若干周秦以下則焚膏繼之乙夜乃止夫不殖將
落君子所戒諸生俱屬成材各知奮勉不煩呵譴之及共收
淹貫之益

一詳講論 易曰君子以朋友講習又曰學以聚之問以辨之
古人一義未釋往復辨論不憚再三蓋讀書原以明理非徒
循行數墨佔畢章句凡有疑難務相剖明某講習日淺探索
功疎雖測海觀天未能應焉如響而剝蕉抽繭實則樂此不
疲夫青出於藍而深於藍冰生於水而寒於水發蒙博喻實
有愧於明經賞奇析疑願共期於吾黨

一正文體 詞華本德行之緒餘帖括亦文章之一體魏文帝
云文章經國之大業不朽之盛事况制藝爲獻納之羔雁非
同小伎雕蟲哲匠宗工代有人任惟在理法兼到何處拘執
偏裁實處取義理如海如潮處處著精神繪聲繪色綴江花
於筆底賦謝草於堦前要使排纂之下皆近自然亦惟約爛
之餘乃歸平淡貫穿經史薈萃菁華斯爲得之至於抄襲雷
同尤所切戒子元冒向秀之書延清攘希夷之句事同竊盜

非止卑污有志之彥豈宜如此

一習古學 六經無文字至左國始漸以文著屈宋馬班遞興接踵各自斐然或拔地倚天或含今茹古詩則柏梁七子蘇李五言下逮六朝唐宋無不探珠驪項增價雞林今 功令雖不專以此取士而古學經解俱有考期館選課程悉繩此欵惟識高而學博乃能儲以待時慷慨凌霄有終南嵩華之氣淵涵滄瀾有洞庭彭蠡之風斯爲合式

一端書法 心通八法字值千金殫平生之精成一家之體古人若是今亦宜然柳公權曰心正則筆正郝臨川云心正則氣定氣定則腕法筆端墨注無意而皆意不法而皆法士人

德平縣志

卷十一 藝文

六

天成謙記南紙店代印
濟南城內芙蓉街路西

誦習之餘明窗淨几筆精硯良臨摹古帖凡鍾情王態柳骨顏筋兼收諸家之長務取最高之格不特精於筆陣亦可收攝身心檢束筋力

一裕經濟 竊聞長者餘論謂我輩總以三排六比埋沒平生古今事局盲如黑漆他日草草出身從何把捉印證又云今人讀書是讀書做官是做官何嘗歸攝一路此真鍼砭刺骨語也幼學壯行求志達道原非兩樞事如禮制樂律刑名錢穀以及籌邊防海諸事宜俱由講之有素豈臨時所能猝辦史遷云素所樹立然也可不勉哉

以上十則取其近裏着已非同迂濶難行率由舊章庶免離道

即致身富貴不愧爲賢精之可以入神循之可以寡過旣專心而致志當藉手以告成

重修書院碑記

鍾大受

邑舊有書院遷徙廢興迄無定所敬業之建自乾隆丁亥知縣彭公始維時舊租無幾彭乃捐俸並勸助極力籌備規模略具余於己酉承乏是邑距彭二十餘年思欲加意潤色而連年歲歉不敢起議五十九年據邑廩生戚世元等請乃爲捐俸以倡並設簿勸助遂有好學好義者量力解囊亦一時盛事也豈可無以記之茲將書院舊存銀兩地租若干並新捐助各若干分列開載勒諸貞珉用彰作人之雅意後之君子嗣而續之庶斯德平縣志

卷十一 藝文

七

天成謙記南紙店代印

濟南城內芙蓉街路西

邑文風賴以日上也爰記

新建白麟書院碑記

邑令 德稜額 笛舟

邑之書院原名般陽雍正四年改爲甘露其後屢經興廢故址已湮沒無存乾隆丁亥前令彭公始即治東社學改建敬業書院乙卯年前令鍾公復重修之四十年來剝落摧殘以興賢育才之地廢爲瓦礫之場實堪憫焉余於乙亥承乏是邑即欲捐廉重修無如專力難成遂致遷延不果每月召諸生暫課於明倫堂誘掖獎勸四載於茲比來鼓舞奮興生童日衆知此地人才素裕特無肄業之區以培植之耳因與諸生會議願首捐俸廉倡修書院諸生及紳士踴躍從事樂爲捐輸因地狹隘乃於

南門內購地五畝餘西接學宮東聯奎樓洵文明之所也遂即
庀材鳩工閱四月而落成規模宏敞遠勝於前考邑志晉武帝
時有白麟見於郊因名見麟里今取以爲額正以見名勝之地
當必有應瑞而興者矣諸生等請記於余爰述創立之由勒諸
貞珉後之君子隨時而修葺之俾有基勿壞足以育人才而培
文風是余之厚望也夫

將軍廟額書後

邑令 何元熙

咸豐六年六月東省旱七月飛蝗起沂曹漫延濟南各州縣邑
在濟之北十七夜蝗入境縱橫往來於月下無數也民甚恐
朝夕步禱至二十七日乃畢去禾稼無損傷者民大喜以爲

德平縣志

卷十二 藝文

八

天成謙記南紙店代印
濟南城內芙蓉街路西

之誠於禱而獲神佑也熙惟神之血食斯土實有不忍斯民
之心蹙然惻然動於不得已蓋不待禱而已陰驅之故一遇禱
而遂盡除之也而乃以爲令之功過矣然竊於此可以爲吾民
警也尙書云天道福善禍淫天以禍福之權寄諸神神即以善
淫之故稽諸民吉凶之機若轉旋焉如以歲之不蓄由於天幸
漠然不加省惕於其心吾烏知今歲之不蓄不將轉而爲異歲
之蓄耶且何解於他邑蓄吾邑獨不爲蓄也記有之能禦大蓄
則祀之蓋觀於 神之所能於昔者如是當益惕然於 神之
爲神而思所以感召之者矣

火神廟額書後

何元熙

神之祀遍天下邑中之祠在城西南隅拜宇下者無有也其缺禮實甚去歲十月城隍廟寢殿不戒於火火之所熾延及殿之陰焚其桷救者手足無所措因問祠有無羣以對急往禱拜已而火熄蓋須臾事耳次早與同官往謝瞻其祠汗甚命潔之而與衆言曰神與人等耳居此職即欲盡此心彌岌岌焉乃平居既置之不顧有事又不以相屬雖大知大勇且不能顧咎其職之未克盡可乎吾蓋因是慨然於天下之故也因與同官約嗣朔望拜如禮而職其事於左

重修龍神祠記

何元熙

古今有恒陽無雨時乎曰無之有恆雨無陽時乎曰無之然則

德平縣志

卷十二 藝文

九

天成謙記南紙店代印
濟南城內芙蓉街路西

天之雨陽一如寒暑晝夜二氣之所鼓盪自然流轉於其中而乃曰是或司之不亦迂乎顧既曰莫或司之則聽其流轉而已而又有神祠之設使人僕僕亟拜焉何也曰此聖人設教之意耳僕僕亟拜不過循其事之當然豈真有與者受者之介乎其間使人若或見之若或聞之也哉然則斯言也神之祀匪特迂也直僞耳率天下之人而以僞相尙聖人何爲神道設教乎邑南門外舊有龍神祠官斯土者僕僕亟拜如故也五年六月熙涖任適大旱禱於神次日雨去夏兩逢旱禱焉亦雨今二月又旱禱如之雨亦如去歲也方初禱時或微雨或一二日不雨再設壇齋宿申請無不雨求則得之求在我者耳求諸人尙夏夏

乎難之况不可知之神祠歲久傾欹不修且壞因捐廉從事報神貺也蓋嘗論之天以陰陽五行降生乎人而莫不賦之以理人以陰陽五行順承乎天而莫非通之於誠神也者秉二氣之精流貫於天地人之中不見不聞若隱若見而清明之氣可以通人之誠以達於天地亦可通天地之氣以達於人夫烏得而不敬祠經始於四月至五月落成巍然煥然之觀雖未或有風雨之蔽覺庶幾焉抑又聞之古有豢龍氏有御龍氏龍方日與人近奚事求尊之爲神遠矣而靈應如是或曰邑有甘露泉取以供神無不雨夫天降膏露地出醴泉聖人之世天地不愛其道寶自應至是顧雲行雨施非神之屬而誰屬耶如謂雨不雨德平縣志

卷十二 藝文

一〇

天成謙記南紙店代印
濟南城內芙蓉街路西

之故實二氣鼓盪於其間如子產所謂吾無求於龍龍亦無求於吾是則熙之所不敢知已

勸修城隍廟敘

何元熙

天下之司民牧者陽屬令而陰屬城隍城隍之福善禍淫又能佐令之所不及故民之敬畏城隍甚於令夫以甚敬甚畏之神聽其棲息之無所此令之責也亦士民之責也因捐廉爲倡士民之有力者使司事人善勸之即以庀材焉所以安神也夫敬則不忍棄畏則不敢荒不忍與不敢交集於其心而事無不舉矣今而後神其無恫矣乎

城隍廟求雨祭文

丁巳二月二十七日

何元熙

竊元熙不德蒞任三年幸叨安謐前因麥苗缺雨初八九十等

日潔誠步禱是日及二十一等日亦略沾濡然而膏澤未深苗而不秀自茲以往將成旱灾人心者所以通神明而徹上下者也心或不誠昭格何有撫衷自問負疚必多顧天生斯民陽屬令而陰則屬神所謂裁成輔相相與以有成者也神之佐民本不因令之求而始降之澤則豈因令之不誠而遂屯其膏特恐天降之灾神莫能挽民以不誠之故而致怨於令必以不雨之故而致怨於神夫以不誠而召怨令固無辭尊神昭昭在上方且求所以默相之處乃竟以不雨而得怨神之正直慈祥必有權衡於其際者用擇明日申時躬取甘露泉按先天八卦方位

德平縣志

卷十二 藝文

一一

天成謙記南紙店代印
濟南城內芙蓉街路西

命道士人等迴環敬誦九宮誦言藉宣天地之通以作風雷之應伏乞尊神念此時艱不以令之盡誠不盡誠為憑而以民之得雨不得雨為念裁成輔相上召天和不得崇朝斯民必有渥被夫恩澤者矣謹告

先天壇式九宮誦言等篇並詳雜記

城隍廟謝雨祭文

三月初二日

何元熙

竊元熙前月二十七因四鄉缺雨約合同官於二十八日設壇步禱昨初一日荷沛甘霖從此土膏沾濡麥苗滋長預卜豐亨之兆同依覆載之寬不盡微忱曷勝殷謝伏惟尊神陰陽默相化育無私上通天地之和宏施厚澤下慰閭閻之望普遂羣生既不以令之不職而棄其民亦不以民之無知而弛厥愛恩斯

備矣敢或忘乎元熙等惟有彌加兢惕各矢公誠挽風俗以還純召雨暘之時若庶報高厚無任瞻依謹謝

城隍廟求雨祭文 四月初一日

何元熙

竊元熙於前月下旬因雨稀少潔誠步禱仰荷神庥甘霖疊沛嗣是以來雨澤又稀農人心急更甚於前伏思神佑下民無微不至當此灾象將成冥冥之求必當百倍於今然至愚者民不知天怒不識神心惟以得雨爲念况今之日又屬迫不及待之秋元熙心切悚惶實無所措謹於今夜齋宿神祠明晨糾集同官恭迓龍神到壇朝夕祈禱夫天降之灾孽由自作省愆不暇違敢言求然父母之於子也始雖怒其不肖而鞭笞之繼且因

德平縣志

卷十二 藝文

一一一

天成謙記南紙店代印
濟南城內芙蓉街路西

其請求而赦宥之上天仁愛爲心豈僅視民如子特必有人焉代爲宛轉於其闕庶施恩而恩不褻耳伏祈尊神上體天心下矜民困不以民之無知而靳其力不以天之難挽而懈其誠至再至三感必有應元熙待罪斯土不勝激切屏營之至謹告

城隍廟謝雨祭文 四月十一日

何元熙

竊元熙前以雨澤未降肅文申請甫三日而因公晉省彌切疚心方思公回再禱乃初七微雨初八而大雨滂沱四野霑足農民歡暢匪言可宣其尤異者雨雖各邑所同雨之深透吾邑所獨非神之力曷克至此元熙惟有泥首神祠虔申拜謝伏惟尊神清明在抱慈愛爲心始因天之薄怒而示以灾繼因民之可

矜而廣其澤統一方於在宥惠四境以咸安惻怛如斯銜感曷已元熙自此躬率子民各安厥業不以小康而荒其職不以无咎而怠其誠修益加修勉益加勉庶蒙昭鑒母任瞻依謹謝

重修城隍廟碑

何元熙

禍福人所時有也人情畏無形之禍福比之有形之禍福爲甚何者有形之禍福主之者人可以吾計趨避之無形之禍福司之者神不可以計迎距之故尤畏焉顧人旣以福人禍人之故而畏神矣亦知神之福我而禍我者何爲乎今夫草木鳥獸之在山非草木鳥獸之故爲附麗也山之土石實足以載之蛟龍魚鱉之居水非蛟龍魚鱉之好爲潛藏也水之波瀾實足以畜

德平縣志

卷十二 藝文

一三二

天成謙記南紙店代印
濟南城內芙蓉街路西

之妖祥休咎之在人非妖祥休咎之自爲來去也人之氣骸實足以取之世見夫禍福之來渺茫不測幾疑天道之無憑不知惠迪者理順以順召順相感而吉生焉從逆者理逆以逆召逆相感而凶生焉事有固然勢有必至者且天以禍福之權寄諸神必其聰明正直而一者也聰明則不蔽正眞則不阿不蔽不阿則福必不可倖邀而禍必不可倖免故使爲善獲福之人一旦改弦易轍去善而趨不善吾知不轉瞬而禍及之矣爲惡獲禍之人一旦疾首痛心去不善而遷善吾知不旋踵而福隨之矣不知爲善去惡於禍福未萌之時而惟奔走祈禱於禍福已形之後豈不謬歟余邑令也令之與神分陰陽而同司民牧者

也見有奉公守法孳孳爲善之人令且有以勸之矣見有作奸犯科孳孳爲惡之人令且有以懲之矣然則人苟孝而親敬而兄弟和而宗族鄉黨朋友不以善小而不爲不以惡小而爲之冥冥之中神豈有不福之者而又何禍之足畏廟宇者所以棲神猶官之有署也鳩工它材爭先恐後善端發見可見矣特恐其狃於禍福之說而不知反本將有背於神之禍福斯民之意而并失令之所以期望斯民者於是乎言

重興白麟書院月課膏火碑記

邑令陳佐平 昇輔

邑之書院肇自有明其始爲般陽迄 國朝爲甘露又爲敬業

今爲白麟更名者屢而廢興不一同治元年壬戌何公來宰是

德平縣志

卷十一 藝文

一四

天成謙記南紙店代印
濟南城內芙蓉街路西

邑慮不殖之將落也倡首勸捐得京錢七千緡慮無源之易竭也請於上憲准發給各當店生息爲每歲諸生膏火及延聘修脯之費而期垂諸久遠由是士氣蒸然文風漸起法至善也七年捻匪狂肆邑宰周敏卿公奉憲札修葺城池募捐不及遂議允借此墊用當是時烽烟滿目風鶴驚心其弱而才者率籌辦團防圩墅爲保衛身家之計其強有力者或爛習刀矛戈盾爲芟夷患難之謀而絃誦之聲寢迨逆平越數年僅獲償京錢五千緡邑宰周少鶴公甫爲請於憲而去歲癸酉余莅茲土紳董李同楠等始請改舊規以興文教考縣志風俗人尙忠勇家業農桑惜其小民猶有頑梗好訟者嗟乎此教化之所宜亟講也

夫忠勇而弗澤以詩書則忠而愚勇而亂飽煖而弗加以教育則禮節之不知榮辱之不曉無惑乎頑梗爭鬪之風日熾古今化民成俗必由於學而在斯邑尤當務之爲急也顧興教必自書院始民風端於士習也書院以經費爲重資富而後能訓也自今以往諸生潛其心於道德肆其力於文章出則掇巍科爲名宦處則興仁講讓型方訓俗相與濡染變化於無窮是邑之幸也余之所厚望也故樂爲之記

沙河古堤記

孔昭珩

余所居敝廬之南有古堤焉自陵境入德平凸凹斷續蜿蜒折而東之稽諸志乘或稱鉤盤或稱馬頰或稱鬲津博雅者不能

德平縣志

卷十一 藝文

一五

天成謙記南紙店代印
濟南城內芙蓉街路西

核其實然其爲黃流故蹟無疑也河故多沙陵谷變遷以來沙隨風積其形若邱若壑若澗若阿其高者若層巒若壘嶂緣隄多植棗梨桃杏閒以楊柳其隙則蘆葦菁茅之屬彌望無際每當春秋佳日邀二三同志往遊其地至則相與選樹幄坐草茵見夫絳蘂萬株綠陰千頃觴詠竟日流連忘返幾不知邨之東西阡之南北也因思陵德諸邑皆平原故墟史冊所書河流決塞不一當汎濫時實受其患不謂數千百年後巨浸變爲腴壤轉足爲騷人韻士遊覽登臨之勝是亦造物者之巧已不獨此也其中物產蕃饒鬻果蒞者於斯採薪蒸者亦於斯閭左之民率藉此謀衣食焉古人緬河洛而思禹功今之登是隄者懷古

深情差堪髣髴固不僅如武陵桃花源徒出於古人之寓言也是不可以不記

改建文昌閣碑記

按察使薛福宸 撫屏

自人材出於科舉之一途而文昌始爲科名主天下自都國至於州邑咸祀之篤明禋即以闡文運也然而人材盛衰之數往往今古不同豈惟時勢有變遷亦由地脉有興廢而人事之培植於是不可不講矣德平文昌閣舊在明倫堂西北其地湫隘廊宇褊狹建自何時無所考邑人習而安之歲甲戌陳大令昇輔持縣志來見竊訝地爲古之兩般代產名流最著者漢之高詡禰衡晉之明曾暘父子尙已自有制科以來唐宋之趙寵劉德平縣志

卷十二 藝文

一六

天成謙記南紙店代印

濟南城內芙蓉街路西

禹有明之葛端肅公子孫簪纓不絕者累葉其他掇巍科登顯仕者尤不乏人 國朝文教廣敷宇內嚮化而二百餘年以來德平之士治經義應有司之試者不爲不多而取上第躋通顯者久無聞焉形家言以爲文昌閣建非其地也因屬昇輔諭邑人改遷之苦無資余乃與郡守豫君東屏及昇輔各捐俸金昇輔經始其事後令周君和齋復玉成之紳耆等更廣爲勸募共得若干緡相地於邑之南門書院東隅鳩工庀材不數月告成邑紳來求爲記余爲之語曰是役也出幽遷明煥然聿新豈徒壯觀瞻哉將復觀曩時科第人文之盛也因書以詒邑紳俾鑄之石

文林郎孔公墓誌銘

廣西學政
德州人

吳華年

峻峯

濟之北以道德文章模範士林者首推吾玉峯夫子焉夫子諱昭珩字葱佩號玉峯姓孔氏至聖裔也生而穎異讀書輒數行下事太公太孺人孝養無方孺慕依然年十六遊郡庠旋食廩餼才名遂大噪道光癸卯領鄉薦明年甲辰捷禮闈未殿試請假旋里蓋不欲久曠晨昏也相繼丁內外艱哀毀幾至滅性自是遂無意科名矣家居教授數十百里外士爭負笈從焉擢巍科登顯仕者往往出其門治經則如廣川之下帷行文則如子安之腹稿雜體等作磊落欽崎光燄萬丈詩以超渾勝未嘗規唐摹宋而太白之雄奇少陵之真摯蓋兼而有之嗚乎以吾

德平縣志

卷十二

藝文

一七

天成謙記南紙店代印
濟南城內芙蓉街路西

師道德文章未獲置身通顯黼黻承平惜矣然優游林下翰墨自娛時與二三同志杖履於山巔水涯臨風把酒待月敲詩則宦達者或無此福緣也銘曰尼山道重今古罕儔吾師繼起遠紹箕裘華簪未珥詩卷長留佳城鬱鬱俎豆千秋

改建文昌宮落成賦

李敬身

邑孝廉

惟上帝之司衡兮稟神明而作宰握桂籍以臨茲兮拱薇垣而簡在居台極以岬嶸兮耀魁匡而璨璫璣默運乎九天兮樵燎用規乎億載象室璧而妥聖靈兮憲黼陬而耀俊彩文明應乎珠蹀祀典光於寰海都都豐藻飾之楹邑邑絜薦馨之鼎蓋更十七世而彌尊亦越數千年而不改繫自典重欽崇享隆禋

獻輪奐肇修階廉斯建采離立以軒翊勢翬飛而聳健匪崇麗
以增華迺宏規以示憲夫何址隘墟隅垣頽塵空廟落塗茨簷
荒露蔓瞻奎壁而光韜詢棘闈而遇鈍豈地理兮未詳遂人文
兮屢頓將見麟之瑞空傳而賦鵠之才終困皇皇帝君不振斯
文靈鍾瑞庠輝燦景斐乃牖形家以相宅階史氏以占氛東爨
奎樓之第蔚兮西耀聖殿之苾芬南眺鬲城之古堞兮北瞻光
嶽之晨曛旁則街衢洞達闈闈區分書林擷桂藝苑擧芹瞰祝
融之程桷拱勾袿之榆粉氣似珠而儵燭芒射斗而棼煜誠足
廊閎閉而制拓新龔斲而工勤於時練辰演策勸募周章觀察
捐廉而惠溥郡侯踵事而仁揚行部分濂溪之俸虛堂傾偉節
德平縣志

菡萏披敷而刻翠荷蕖反植以雕紅遂考星官以肖像崇帝座而報功左上將而右貴相前太尉而後司空彩筆塑瑤京之吏朱衣裝玉案之童眞宰憑依於黼構馨香掩靄乎綺籠狀若蟾宮之皜曜又似乎貝闕之穹窿爾其章采璘班崢嶸熠燿託之丹青文以赭堊繪畫神示態姿綽約耿張翼之精光闡梓潼之秘鑰或馭氣以驂鸞或騰天而駕鶴靡不寫載壁牆績形瓊閣宰官統九十七化而具徵孝弟計四十八人而遞作則有聖哲楷模倫行遑蹠公感雷風帝親湯藥烏耨象封鳩分魚躍事各繆形說堪約略遂使想像心傾徘徊足躩遊揚被乎詩聲感發流於歌嘏芳蕤播而春華茂實騰而秋落於是薦三犧效五牲

德平縣志

卷十一 藝文

一九

天成謙記南紙店代印

濟南城內芙蓉街路西

張雅樂奏和平劇優孟歌顛成百禮洽萬舞并迺銘籀篆勒砥貞憲臺撰記椽筆題名錄孝經以架夔刊陰隲以式程碑讀蕉窗之剗額臚芸館之英故令斯人啓門牆之奧儲廊廟之英器宇侔乎樑棟颯流蔚乎膠鬲羌乃少微光顯司祿星明材呈崑玉宴卜林瓊將復聞一鶚之特薦與三鳳之齊鳴繫厥宮之瑰瑋兆斯邑之簪纓神靈扶其棟宇俎豆亘其檐櫺實鑒觀之攸耄庶綿科第而降休禎頌曰彤彤靈宮栳雲路兮蹇嶮嶮困歆景慕兮爝煇焯煌晃藝圃兮紫蔚蔥翠焄蘭炷兮釐薦藹亨殷率籲兮業業殿廷神眷顧兮默秉文衡宏布護兮格召宗祈迴天步兮古士吉人荷隆遇兮於鑠適成靈臺賦兮永永無疆膺

福祚兮

遜志堂詩序

邑令周士瀚

夫詩以言志詩也者達人之性情而寫人之遭際者也所以讀古人詩古人之言行經濟得失窮通胥於是乎寓焉德平李修來先生學博而言謹志圓而行方不役役於富貴不蹙蹙於貧賤居恒研求經史涉獵詩文繼晷焚膏不稍暇逸乃懷抱利器鬱鬱不得志於有司卒以副車司鐸城陽不能發其蘊蓄以上鳴 國家之盛天之困先生者抑何甚耶其平時所作近體古排凡抒寫性靈者莫不具唐宋氣格足為後學津梁惜先生歸道山平時手迹蕩焉無存瀚自束髮受書即蒙先生循循善誘德平縣志

卷十二 藝文

二〇

天成謙記南紙店代印

濟南城內芙蓉街路西

朝夕無倦容洵不愧為人師迨甲子春仲瀚忝宰斯土莅任數月後訪求先生遺集均已散佚惟詩稿家存尚有若干首亟為翻閱亦均係寫胸中之鬱積借題發揮每有慨乎言之者吉光片羽倍覺堪珍隨即捐俸付剞劂氏亦籍以窺見一斑俾人知先生生平之遭際與性情云爾

創建試院碑記

李敬熙邑舉人

自歷代以科第取士而都國以及州邑莫不以試院為賢良登進之場如學憲之鎖院掄才主司之棘闈選士鉅矣吾邑舊無試院邑令校童子試皆於學宮局試之道光閒改建書院地寢廣廓試甚便顧士之涵濡於教澤者日益衆書室又僅數楹往

往佐以席棚每值縣試之期負皮几攜坐具風檐雪案多士苦
之夫校士必有專地而後關防密稽察周矧茂異發軔之初可
少此廣廈之庇使之揚眉吐氣以暢其所欲言乎光緒丁丑周
邑侯和哉議建於書院之右方以邑素貧瘠難之會邑紳龐君
景奎以事捐金三百餘兩創立正廳及左右厨舍既而衆慮不
齊工貲無出號舍竟不果置越二載紳董閻君汝霖請於邑侯
蔣君山公延本邑好義者共爲商捐一時人心踴躍腋集成裘
遂乃鳩工庀材昕夕辛勤不辭勞勩不數月而東西文場更道
周垣燦然建制如法役既蒞邑士人顧而樂之謂從此掇巍科
登顯要增光閭里黼黻皇猷皆是舉爲之嚆矢也歲壬辰徵記
德平縣志

卷十二

藝文

一一一

天成謹記南紙店代印
濟南城內芙蓉街路西

於余余惟人才之興關乎培植吾邑自有明以來名公碩彥難
更僕數獨於一邑選試之區特留其事以俟來許多士幸生其
際仰觀棟宇之輝煌親炙堂廉之整肅果使人才翹舉雲蒸霞
蔚以無負乎地之效靈與一時培植之盛孰謂科名鼎貴今遂
異於昔所云耶記之以爲多士勗

重修三廟碑記

葛本徽

邑廩生

邑西郭外之北偏爲將軍廟自雍正五年袁邑侯奉文建修載
之祀典禮也其西爲關帝廟帝之祀達乎天下在邑城以南門
外之廟爲專祀而通衢委巷莫不有廟此則其尤著者也又迤
東爲金姑廟神之能禦災患尤彰彰耳目聞顧其廟建於乾隆

甲申將軍廟亦於是年重修迄今百二十餘年矣殿宇傾圮藝越實甚光緒己丑少甫凌公蒞茲士亟思繕而葺之會調齊東議遂寢越二載回任首捐廉俸囑貢生龐清榮等董其事復募五鄉得若干緡鳩工庀材舉三廟而一新之繚以周垣垣之外舊有橋曰鳴鳳並竣乃工凡六踰月而成夫神之佑民莫大乎兩陽時若年穀順成即或沴戾所鍾飛蝗犯境必驅之勿使害稼稼穡登則民物滋百里之地樂郊也方里之城樂國也商賈輳集行旋偕來長橋臥波負擔驅車者謳吟不絕如史書所載中牟異政蝗不爲災與夫驅以大風啄於飛鳥雖曰仁政豈非神道哉記有之能禦大災則祀之祀神所以爲民也然必民之德平縣志

卷十二 藝文

二二一

天成謙記南紙店代印

濟南城內芙蓉街路西

可以獲神之佑而神乃佑之必長民者誠愛斯民善導斯民虔禱焉以丐神之佑而神乃克佑之則神人感召之理然也歲壬辰蝗蝻生野邑本瘠士幸免於災秋登之餘小民奔走報賽僉曰微神之力不及此然則是役也美輪美奐締造經營凡以爲吾民造福也故樂爲之記

重修城隍廟碑記

葛本嶽

城隍廟始建無考重修則肇於明嘉靖閒先太保端肅公爲之記我朝歷有興修咸豐中何邑侯師竹復加繕葺規模具備今又三十餘年矣棟桴尙在丹堊將落大懼無以肅廟貌而妥明神邑之人方欲葺而新之歲壬辰邑侯凌公蒞茲土刑清政

簡凡壇廟之列於秩祀者靡不舉修紳董閭汝霖龐清榮等亟以爲請公首捐廉俸以倡士民踴躍樂輸恐後蓋自季春經而始之凡六閱月落成爾其畫棟連雲采椽耀日輝煌鉅麗望之而起敬起畏者正殿也覽繪塑之狀嚴供設之儀憬然於暮鼓晨鐘之下者東西廊也珠箔丹扉瑤琴玉管雅奏和平而神人歡洽者樂樓也與夫退寢在後以及左右之龕座几案供神之棲依者靡不煥然巍然一方具瞻矣夫城隍爲邑神之主凡守令莅任必先祭於廟而後視篆有事於山川則載其主以合食於壇有事於厲則位其主於中神固佐有司以治民者也雖幽獄輪迴之說語多不經而在愚夫愚婦徇利忘義三尺法或不德平縣志

卷十一 藝文

一三二

天成謙記南紙店代印

濟南城內芙蓉街路西

能禁及語以果報之不爽鑒觀之有赫罔弗怵然心目惴惴焉悔罪而思遷則理幽而明以治舉一而百可興古聖人所謂神道設教者不誠然歟矧聰明正直之謂神吾邑數年以來雨暘時若年穀順成微神之惠不及此自茲以往神饗而民福俗易而風純於以成和親康樂之書以上副 國家明德恤祀之典者豈不於神是賴哉是爲記

重修魁樓記

李裕方

邑廩生

史記天官書以斗魁戴筐六星爲文昌宮而後之祀文昌者必以魁宿附焉蓋以文昌斗極所戴命祿將相之司實取諸魁以爲以柄也邑城東南隅有魁樓上應蒼龍朱雀之華下維鉤盤

馬頰之勢望之亭亭若華蓋其層累而直上也丹梯雲路引多
士以誕登至於升高矚遠搔首問天可通呼吸屹屹乎與光嶽
並峙矣先是邑侯袁公以學宮前少拱衛建樓於城之南隅額
曰聚奎越道光甲辰德邑侯笛舟以建非其地採堪輿家說移
之巽位維時閣比部圖南孔徵士玉峯並捷南宮邑人士咸額
手爲斯文幸繼至今又四十餘年矣久而弗葺向之烏斯革鞏
斯飛者半爲風雨所摧殘習而安焉無以煥奎壁之光即無以
培秀靈之氣又安望是安是侑者惠我士林俾入雲衢以翔步
也歲己丑紹黼凌公宰斯土即欲繕而葺之以秋歎不果行越
二載遂令書院董事等竣其功敝者新之頽者易之剝落者丹
之塗之近則環拱文昌耀珠躡之俊彩遠則輝煌聖殿騰射斗
之文光是年秋闈先登者果領鄉薦以去詩所謂有相之道然
歟否歟夫兩間位置之奇靜存乎象而動寓乎機今之傑閣飛
甍以應斗魁之宿者象也而機已伏焉故輪奐聿新之象一英
賢崛起之機也士果勉爲忠孝以默契明神發爲文章以振興
氣運而處爲楨幹出爲棟梁以無負乎降鑒靈爽之憑則異日
翔木天擢魁科皆此舉爲之兆矣余旣樂觀其成而又願後之
君子修葺於勿替也敬識之以爲異日券云

烈婦王氏碑記

李敬熙

古之以節烈稱者若截髮髻耳露筋斷臂諸賢媛彪炳丹青風

厲巾幗矣吾邑俗敦氣誼華寶繩樞之嫠靡不心松柏而節竹
筠求其致命遂志久而彌彰則王氏其尤著者矣王氏故儒家
女歲十七歸周君施普余外家也事舅姑以孝著躬秉勞作如
鮑宣妻佐夫辭不義金如樂羊子妻內庭嘖嘖僉云幸哉新婦
賢歲晏歸甯猝遇強暴以非義犯竟殉節以亡嗟呼貞女之誼
比於忠臣歷觀竹帛所垂世之談忠義慕俠烈者正不乏人一
旦卒冒阽危其不至苟顏偷生虧閑爽操者或什不得一二焉
聞烈婦之行其亦知所愧哉烈婦居守鳴環下堂之誠素嫻女
史壺範之箴重一死於泰山矢寸心於匪石嗒焉長化何知異
時之丹簡而齎沒之志其賴今以慰也已今 上御極之十

德平縣志

卷十二 藝文

二五

天成謙記南紙店代印
濟南城內芙蓉街路西

有三年邑諸生以狀上邑宰會 宮保張公來撫東土得如例
奏列 天子報可旌其墓飲血貞魂業增光於泉壤殞軀淑
媛終表節於鄉閭蓋相越三十餘年而幽以闕微以顯一時觀
者如堵墻靡不能去車者式騎者立徒者累足婦孺嘯唏至泣
數行下嗚乎天理民彝自無容沒烈婦雖死猶生矣烈婦兄待
詔王君承邑宰胡公意將以戊子之冬勒貞珉以示諸後而囑
予爲之記爰敬述其事實俾藉垂於不朽云爾

增築田家堰記

知縣 凌錫祺 紹甫

邑西北十二里爲土河舊名篤馬河劉宋元嘉閒河流衝決古
堤邑令周雲霖躬親修築明居士僧紹爲之記其南爲小河今

亦名鬲津河考邑乘自雍正五年始開本名馬河俗亦之謂義河以洩高唐平原陵縣諸水至德平西范家橋入焉顧其河久未挑濬往往泛溢爲害邑人由范家橋築堤上自基山綿亘數里名田家堰以捍之策善已近十數年以來黃流北與濟合瀕河幾無完土德平去河較遠幸免於災則堤堰之修甚不可以不預也光緒己丑予捧檄宰是邑公餘之暇循視河防古堤寢已漫平時方隱以爲憂次年五月閒河決上游由陵縣一帶兩水合流於理合務而泛濫於城北亟諭紳董爲堵築計會有齊東之調未克蒞事旣而伏水溢湧田家堰潰決尤甚堰外諸村幸免漂沒而皆已無秋矣夫黃流爲齊魯鉅患州邑波及殆徧

德平縣志

卷十二 藝文

一六

天成謙記南紙店代印

濟南城內芙蓉街路西

况篤馬河自乾隆閒壅決數次非預以防之吾民不其魚乎辛卯春予重莅茲土遂延紳董諸君依基山碑所載近堰修工共一百六十三村計村分段派夫役具椿料自陵縣王宣廟至范家橋接入篤馬河堤蜿蜒修至韓家橋凡六十餘里而止役旣竣董事諸君乞予一言以志不朽夫人情甘其所甚便而苦於不及防德邑自乾嘉以來安瀾者百有餘年兩河之閒民且田之矣一旦卒遇潰決近河者以堵築爲先近窪者以淪疏爲急呶呶爭執聚訟不休何若未雨綢繆相土地之宜謹隄防時修築尤爲事半而功倍也自茲以往尙其遵守成規時加繕治俾有基而勿壞焉則其利豈有涯哉用備書其原委俾勒之石

重修光嶽樓記

李寬達 邑貢生

古今名勝之區類爲才士遊人憩息之所而一時秀靈之鍾毓人文之奮興每於是乎繫焉吾邑自前明隆慶閒程春海邑侯以學宮後無主山建樓於城之北隅越數載鄭侯思成踵修學廟更其名曰光嶽蓋取光嶽氣完人才輩出之意又十餘年王公倣恒宰斯邑公課餘閒行視郊邑觀河流之曲折相土脈之深厚蒼秀磅礴當有人文薈萃其閒復建樓於城之南隅扁曰聚五俾與光嶽互相輝映以爲文明之助所以嘉惠吾德者至深且遠也夫才不擇地而生矧吾邑自漢魏以來代不乏人若正平之逸才僧紹之清操尙矣洎乎勝代葛端肅公以名進士

德平縣志

卷十一 藝文

二七

天成謙記南紙店代印
濟南城內芙蓉街路西

而爲名臣子姓簪纓累葉不墜其他芥拾青紫或奏龔黃之績或著賈董之名賢徬挺生指不勝屈雖曰關乎運會而其培養士氣振興文教之功良亦非淺鮮已我朝文治蒸蒸賢有司之莅吾土者隨廢圮飭治之俾有基而勿壞者二百年於茲矣今上御極之十有四年紹黼凌公來任是邦慮科第人文之未盛也採堪輿家說凡疇昔建置有關於學校者靡不舉修而光嶽一樓近爲署廨增炳蔚之觀遠爲黌宮壯恢宏之氣尤當務爲急爰囑紳董閭君櫟華竣其工遂乃鳩工庀材煥然而一新之歷五踰月落成歲辛卯邑士人謀鑄諸石而俾余爲之記余惟兩閒鍾毓之奇上則爲日星下則爲河嶽而人實稟其

秀以生焉誠使登斯樓者深惟昔先正命名之旨與諸君子培植之勤將必淬厲以試勉爲大成之器而進以光廊廟退以光閭里則斯樓之作又豈第名勝登臨之地已耶余旣樂觀其成而又幸凌侯之大有造於吾邑也於是乎書

重修關帝廟碑記

李敬熙

關帝之祀自都國以下至於委巷窮閭莫不有廟而其載之憲典歷代尊奉顯號有加歲以二仲升香擬諸宣聖儀至隆也邑南門外之西偏舊有關帝廟建修經始志乘載之甚詳洎同治戊辰捻氛逼城下幸以靈蹟顯佑轉危爲安是年周敏卿邑侯採士民議詳請匾額以答神貺顧舊廟歷有年所懼不足以壯

德平縣志

卷十二 藝文

二一八

天成謙記南紙店代印

濟南城內芙蓉街路西

觀瞻時以兵燹之餘有志而未逮也越歲乙酉胡邑侯少卿來任是邦秉要釐繁周察民隱凡今所不便及曩所願欲而未暇者無不明斷於心立罷而亟行之旣二載政治人和遂謀致神捐俸餘數百金命紳耆石際和等諏吉督工復爲勸募紳商邑之有力而樂輸者靡不踴躍襄事遂乃聚資庀材因舊址拓而充之作正殿三楹廣以墀廊增建二門門樓重整大門繚以周垣後爲啓聖殿旁建齋房藻稅丹楹聿新輪奐蓋向之顯邀聖佑懼無以妥明神隆祈報者至此而適觀厥成斯誠邑士人之一大快矣顧或謂神一天也未必憑依於是也夫天無往而不覆神亦無往而弗格故蘇子曰神之在天下猶水之在地中鑿

井得泉而曰水專在是豈理也哉矧帝之聲靈赫濯百世而下凡有血氣者莫不尊親至於家祀而戶祝之蓋亦天理民彝誠有發於不容已者則信乎無往弗格而聖神洋洋乎在上矣是役也經始於光緒丙戌落成於丁亥仲夏會胡公以調任去未鐫諸石今已七歷寒暑矣使終無以紀之吾恐賢邑侯德政之美倡修之義與當事諸君子督工之勤遂湮沒而弗彰也爰綴筆書之用志不朽且冀後之君子時加修葺以勿廢斯舉也是爲記

捐增義塾碑記

凌錫祺

古者里必有塾凡里之子弟八歲而入小學所以端蒙養之始

德平縣志

卷十一 藝文

二九

天成謙記南紙店代印
濟南城內芙蓉街路西

培風化之原而爲爲國育賢之首務也自歷代庠序之法寢與古異社學書院之制又僅設於城邑而士之僻處鄉隅者遂不免以貧廢學則義塾之設可無亟講哉德平自 國朝乾隆間錢邑侯置小學田一項其後邑貢生郭永安捐增書院宅地嗣於其地草創數楹以備小學第租稅甚薄不足以贍生徒時以書院尙無經費欲拓充而未暇也越光緒丁亥胡邑侯少卿以小學田歲久不敷原數且地饒租薄佃戶不免中飽派書院董事閻汝霖等丈清八十八畝有奇遂與諸董事酌增租價並增義塾爲二曰育賢曰養正一在東門內一在北郭外玉皇廟每歲義塾收租著爲經費以備修脯之資數年以來城內附郭試

入學宮者歲不乏人則胡侯大有造於斯土也歲己丑予捧檄
任斯邑課試之餘詢及義塾條規即欲擴充其制顧以經費無
出未遑遽議又三年爰與董事諸君酌依舊章增設三塾曰儲
翰曰毓俊曰培元分置各鎮修脯之費按季由署捐發並爲詳
請 各憲批示立案以便遵循垂久遠繼自今窮閭僻壤庶免
向隅矣夫正俗必自興學始治術莫要於人才也崇儒必自經
費始資富乃以能訓也故孟子曰三代之學皆所以明人倫也
人倫明於上小民親於下是道也所以家諭而戶曉者也是故
黨有庠家有塾至於負耒橫經童而習焉長而安焉不見異術
而遷焉而風俗猶有不純者哉邑之人誠由此而加勉焉將見
德平縣志

卷十二

藝文

三〇

天成謙記南紙店代印
濟南城內芙蓉街路西

文治蒸蒸以上副 國家籲俊掄才之選者皆於是乎在矣予

旣囑諸君經理其事復援筆識其巔末如此云

詩詞

六朝

贈明祭酒山賓

時山賓築室不就遣使齋金并貽此詩

蕭統

平仲古稱奇夷齊昔擅美令則挺伊賢東齊固多士築室非道
傍置宅歸仁里庚桑方有繫原生今易擬必來三徑人將招五

經士

唐

經鸚鵡洲弔禰衡

李白

魏帝營八極蟻視一禰衡黃祖斗筭人殺之受惡名吳江賦鸚
鵡落筆超羣英鏘鏘振金玉句句欲飛鳴鷺鸚啄孤鳳千春傷

德平縣志

卷十二 藝文

天成謙記南紙店代印濟南城內芙蓉街路西

我情五嶽起方寸隱然詎可平才高竟何施寡識昌天刑至今
芳洲上蘭蕙不忍生

酬孟雲卿

杜甫

樂極傷頭白更長愛燭紅相逢雖袞袞告別莫匆匆但恐天河
落甯辭酒盞空明朝牽世務揮淚各西東

擬古

中丞孟簡 邑人

劍客不誇貌主人取知心但營纖毫義肯計千萬金勇發看鷺
擊憤來聽虎吟平生貴酬德刃敵無幽深

傷情

校書郎孟雲卿 邑進士

為長心易憂早孤意常傷出門先躊躇入戶亦傍徨此生一何

苦前事安可忘兄弟先我沒孤幼盈我旁舊居近西南河水新
爲梁松柏今在茲安忍思故鄉四時與日月萬物各有常秋風
已一起草木無不霜行行當自勉不忍再思量
明

葛少宰山房

按察使 李攀龍 歷下

少宰山房北海隈千林窈窕白雲開倚窻河勢鈎盤出拂檻秋
陰碣石來魯國諸生紛授易漢庭多士滿題才臨流重憶乘槎
客濯足還登萬里臺

輓葛與川先生

于慎行

少年聲價省郎遊一節冰霜到白頭降嶽神生星應昴濟川功

德平縣志

卷十一 藝文

一一

天成謙記南紙店代印
濟南城內芙蓉街路西

就壑藏舟朱門舊第庭槐冷落日新阡隴樹秋猶有故時雙鶴
在月寒華表不勝愁

送周學諭之任江安

葛引生 邑廩生

除書新拜漢專城露冕高帷壯此行絳帳有情留季長郎星得
度問君平巫山峯翠秋初入瀘水波激月正明共羨家風傳茂
叔勳名恭定看齊聲 恭定年
富諡

葛中翰川上草堂二首 疊韻

邑令 鄭材

我聞杜陵老浣花溪裏流風好又聞柴桑翁悠然盤桓松菊中
一邱一壑有餘美萬事萬物徒爲爾枕流漱石襟期清弄月吟
風懷抱喜此意千秋誰與同此境千年誰得似盡道逍遙大雅

壇今之平昌葛天氏葛君別業寄城隈葛君高齋傍溪開人世
喧囂都不染疑從方壺接蓬萊白雲漠漠環樓閣碧草芼芼拂
釣臺寶劍瑤琴相輝映左圖右史日徘徊况復桃李茂結陰况
復松柏茂成林梧桐月落幽人夢風雨寒生楚客襟幽人楚客
偏憐此青門白社自招尋太公磻溪地謝傅東山岑卷舒初無
意行藏亦何心棲遲斗酒且爲樂匡坐還能梁甫吟

主人自是柴桑老寤寐但知邱壑好朝辭薇館暮山翁無日不
在烟霞中人間不識金馬美鳳池染翰聊爾爾挂冠東上學逢
萌著書西來逢尹喜徐徐于于誰得似古有無懷葛天氏誅莠
結屋傍城隈水北原南一徑開迤邐清流引盤兩籠葱佳氣接

德平縣志

卷十一 藝文

三

天成課記南紙店代印
濟南城內芙蓉街路西

蓬萊下俯深沼上臨高臺川雲摩盪魚鳥徘徊恍疑蘭亭之曲
山之陰飛羽觴兮坐深林傾千日之美酒滌浮生之煩襟有客
有客兮結伴而相尋拂塵當風簷天花落雲岑舉深杯兮酌明
月撫無絃兮彈素心曲終歸去不知處倚歌和作山居吟

此一首云

係吳郡陸
西星和

和前韻

党天爵

邑孝廉

聞道當年岩下老年少四五相對好又聞河上翁佚盪約棲道
德中息機但知幽處美俯視囂埃從啞爾悠悠冥冥白雲期長
獻太冲無若喜高風千載自藐然葛君雅淡今神似結廬般上
北窗涼寤言自謂羲皇氏芊芊碧草被牆隈魚沼河池一鑑開

青壁丹崖燦如綺依稀海外之蓬萊落日初霞閃餘映抱杖拂
山傍釣臺斗酒人鱗皆野叟鳴琴散軼醉徘徊有時移棹兮山
陰有時賦花兮鶴林邇回渠兮濯足採若木兮披襟盼庭柯兮
偃蹇探奇字兮幽尋輕風渡飛閣明月出遙岑閒閒十畝間習
靜古人心耽虛哉君之湛凝邱壑樂何如矯首澤畔而行吟

和前韻

吳中高士顧願

我從東海來忽逢漢陰老抱甕灌園畦忘機意自好問之知爲
葛天翁向直青藜秘殿中年來心憶尊鱸美休沐暫歸聊復爾
筆底詩成神鬼愁座中客滿兒童喜葛天原是古之民純龐不
下無懷氏別業平臨般水隈曲檻斜扉次第開換却東方滯金

德平縣志

卷十一 藝文

四

天成謙記南紙店代印
濟南城內芙蓉街路西

馬慕將張仲守蒿萊清觴飛月榭長歎凌風臺鳥啼歌互答雲
在意徘徊無論時兮寒暑日兮晴陰當良朋之萃止輒把臂而
入林舊雨來時岸幘暮霞明處披襟念去咎之良足惜知來歡
之猶可尋逸情孤嶼遠興飛岑言酬節序元賞會心期相伴以
畢世終抱膝而長吟

飲川上草堂分得亭字

顧願

高會清川上應占是聚星暮蟬催急景醉客倚孤亭隔水城疑
逼當歌酒不停美人還勸飲甯惜更沈冥

川上小飲

長洲高士滕季達

避暑來川上虛亭欲報秋客俱方外至主是謝家流竹色尊前

綠荷香席上浮高城遲落日清興尙悠悠

川上草堂偶成

中書 葛彙生 邑人

雲帆昨日下燕京麋鹿追隨世事輕
霽月光風成小隱青山白石愜夙盟
虛名已被當年誤華髮何堪此日生
幸有未荒三徑在漫將心跡付雙清

夏日川上草堂觀荷

邑孝廉 朱 伸

經時睽勝地乘興一相過益覺烟波靜
還看紅翠多彈碁思爛石拚醉試傾荷
豪飲歡方劇移尊藉綠莎

登光嶽樓 四首錄一

邑令 鄭 材

樓臺形勝俯全齊下界蒼茫逐望迷
日出扶桑寒靄斷天連睥

德平縣志

卷十一 藝文

五

天成謙記南紙店代印
濟南城內芙蓉街路西

睥暮雲低東來溟渤衝蓬島北去鄉關靜
鼓鼙傲吏登臨多漫興相如詞賦欲將題

宴光嶽樓

鄭 材

平原今有酒懷抱亦如何賓主東南美
樓臺睥睨多茂林消溽暑明月落高歌
愛此山川意相留沒絳河

共適園庭樹產芝

楊 巍 海豐

高門世祿杳難期秋日氤氳淑氣滋
庭上忽生三秀草朝中應覩萬年枝
已知海岱名雙起會見鳳麟萃一時
野老久將楮石棄猶能扶病寫新詩

前題

太僕 邢 侗 臨邑

愛此商山種鍾英尙寶堂樹棠交棣萼茁幹燦葩房擘擘金光
盛團團露氣灑青雲曾入夢元液許先嘗不羨銅池麗重徵寶
砌芳九莖爭咄異三秀允稱祥慶積滋雲裔文雄兆袞鄉蹇余
葭依切來共奉華觴

國朝

遊月牙池

邑令季靜

湛湛一泓水猶同闕月看一鈎渾是魄半壁已成殘波逐昆明
沫光分太液寒停驂羈宦况回首憶長安

秋月感懷 四之一

朱長允 邑孝廉

屈指霜華四十秋青袍慚愧五陵裘蹉跎匣劍還堪割拋弄機
德平縣志 卷十二 藝文 六 天成謙記南紙店代印 濟南城內芙蓉街路西

梭惜錯投溷俗休矜白似璧藏身聊許潔同鷗河干寥落代輪
技何日康莊駕陸舟

燕邸秋詞

有引未載○時以卓異補戶部主政動歸思故有此作

朱長泰 邑進士

西風雁度一聲秋怯孤寒驚心時候蓴鱸空自好松菊枉成幽
心事悠悠望天涯白雲吐岫 新水令

仰天無語空搔首客裏雙丸驟是處總關愁鐘送黃昏雲迷白
晝丹葉落林邱霜枝欲傲黃花瘦 步步嬌

看看的白雪蒙頭顧影堪愁攬鏡成羞向則道控名韉過眼雲
浮到做了業纏身贅肌癭瘤縱不會爲鷹爲狗也須要應馬應
牛誇甚鳴騶說甚仙舟待尋個海濶天空一任咱魚鳥飛遊 折桂

令

勇退由來羨何須待急流淺深到處皆成溜風雲不測何時驟
時時出沒魚龍門切莫褰裳相就有路休登須防着江心補漏

江兒水

見幾個胙土茅王與侯見幾個藏寶符勳合舊兄幾個姓字兒
覆金甌見幾個腰胯裏懸花綬有幾個走狗烹千年恨有幾個
青蠅濁百代羞好合歹筭只是沒來由早共晚少不得下場頭
只等得二十五殘聲漏那時節三萬六暮景收堪憂閻王老子
相拱候休休好事從前一筆鈎鴈兒落帶得勝令

人生不滿百何事萬年憂消殘歲月三江溜埋沒功名一土邱

德平縣志

卷十二 藝文

七

天成謙記南紙店代印
濟南城內芙蓉街路西

僥僥令

呀早知道這樣索興呵又何苦枉耽愁放懷人世有丹邱陶情

白屋即瀛洲漫思量貴遊早安排退休莫教冷落故園秋收江南

趁西風籬下科頭對良朋從事青州受用些菊香蘭臭身以外

復何求園林好

莊生馬范蠡舟壺天居物外遊相視忘機海上鷗掃除了一天
憂放鬆了兩眉頭看破那白衣蒼狗一任他雲翻雨覆不與他
龍爭虎鬥較甚麼雞前牛後俺呵耳邊廂冷然碧流脚跟頭坦

然道周呀頃覺得從前虛謬沾美酒席太平令

世間不過無何有就裏都叅透晴江巨浪平邃谷芳林壽眼見

的大便宜贏到手

光嶽樓次前令鄭安肅韻

邑令 沈志達

鴻濛灝氣滿晴原野濶雲流天設藩鬲國遙思彭蠡澤文峯高
拂少微垣參差紛堞環春黛縹緲朱甍映曙曦東作正殷民力
出從容退食一凭軒

危樓翠嶽入雲齊萬點烟村柳外迷爽氣朝分風度遠輕寒晚
送雨來低飛觴樂事追河朔多壘憂思聽鼓鼙石上丹文成漫
滅遂城去後許誰題

風流曾記庾公樓長嘯登臨最上頭琴奏清商堪眺遠庭閒吏
事謾尋幽千村社樹餘丹染永夕賓僚大白浮會見盤城歌樂

德平縣志

卷十一 藝文

八

天成謙記南紙店代印

濟南城內芙蓉街路西

歲珊瑚不惜碎雙鉤

經營昔日念民勞謝眺驚人屬我曹海岱孤峯誰得似元龍百
尺未爲高雲橫薊北思偏遠雪霽江南興寄豪農隙不妨修戰
備一時校獵盡弓裘

月牙池

沈志達

石磴磷磷引水渠可知肖得月生初一痕纖影經年吐寸許寒
光半畝餘天上銀盤長易缺池邊新鏡看如虛水晶宮闕疑非
遠五月輕涼透薄裾

解明府招飲光嶽樓

齊廓圖

邑廉 孝

躡履相從俯四隈薰風動處綺窻開看雲時復將琴鶴行酒無

煩藉輿臺畫桷雨過輕練沒平林月湧夜珠來漫言安肅遺踪
遠樓上於今奏雅裁

篤馬河即景

宋國祚

邑布衣

十里風塵十里沙河堤西望少人家路旁桃樹應無主也帶天
天一二花

雁字迴文

郭晉光

邑廩生

青天碧處淨塵囂雁陣排空望遠遙形象宛同書字字勢成揮
翰羽翛翛佇伶幾去雲生巧草戲如飛風起颺垌野奮霄凌翮
健冥鴻近得喜朋邀

濟南三絕

葛周玉

邑拔貢副榜

德平縣志

卷十一 藝文

九

天成謙記南紙店代印
濟南城內芙蓉街路西

舜城西郭柳如絲不為行人綰別離立馬踟躕腸欲斷可憐又
折向南枝

茅舍鈎般水一涯百餘里外路非賒三年兩度明湖住不遣蓬
踪一到家

廿四泉邊喚奈何驪駒催唱短長歌遲遲前路空回首早過西
南十里河

登岱

萬珂

邑增生

突兀層巒插碧霄捫天夙志愜崇朝憑臨列岫千巖小指顧塵
寰萬里遙屏翳御風雲繞屐螭龍捧日海生潮五松畢竟非凡
品古色斑爛壯 聖朝

餞別 彭老夫子錦旋

著有蝸廬小草 李文珠 邑廩生

山斗高高矗矗攀之仰之誰為卜夫子來兮抑何遲夫子去兮
又何速二十萬戶草上風洗却庸耳驚俗目我曹夙沐教育恩
敢竭鄙誠書累幅秦鏡懸物自燭魑魅魍魎盡潛伏玉壺冰倚
案牘不教胥役作威福富民捐粟穀高倉大庾屯比屋於今米
價稱平準大賈不得操盈縮禁樗蒲戒蹋踭更傳新令閉酒局
於今遊手遊食者拚將刀劍買牛犢黨有庠家有塾延來師席
勤誦讀不聞城闕歌挑達髦士森森如立竹有時春花秋月間
獨坐垂簾開書簾有時談笑吐偉詞筆底琅琅如珠玉生鄙俚
調倍促詩中句句皆實錄此日行旌不可留目極山斗歌別曲

德平縣志

卷十一 藝文

一〇

天成謙記南紙店代印
濟南城內芙蓉街路西

誰謂鄧侯挽不來召父杜母廉范叔來春花發甘棠時還待我
公旋又復山斗高高矗矗

前題

趙瑞

明湖夜月子規啼牽動鄉心向舊溪六載拊循棠有蔭一錢謝
絕李無溪漁陽嘉瑞歌岐麥穎上文光卜聚奎引領王喬雙鳥
至滿城竹馬拜輪蹄

前題

錦堂春

于士良

邑廩生

虞詡朝歌龔遂渤海年來花滿河陽正喜兩岐五袴治譜馨香
那知衙放黃紬被陡思樽前綠野堂衆錯愕借寇無謀攀轅截
鐙張皇 難忘錢不受金又捨敬業百世流芳視昔壽春留犢

更著循良敢企濂溪晚信趙幸無昌邑夜遺楊遙盼望何日復
之再任重蔭甘棠

鍾侯六十壽言

張學文

枳棲鸞鳳古平昌屈指年來已六霜雨化三春陽有脚風清兩
袖惠無疆表揚先正光端肅振起斯文邁夜郎興學已推同蜀
郡栽花更欲滿河陽英英豹彩嚴攻錯楚楚蘭芽急就將佇見
珊瑚歸鐵網行看翡翠拱明堂壽民壽國羣稱壽良吏良師共
頌良四野歡聲追召杜千村喜氣媿龔黃見麟里畔岡陵峻蓋
節淵前澤液長天保九如歌不盡載賡雲漢爲章相

壽鍾邑侯

王作霖

邑恩貢

德平縣志

卷十二 藝文

一一

天成謙記南紙店代印
濟南城內芙蓉街路西

律轉初陽歲已周長庚燦燦綺筵流歡顏共庇千間厦高誼如
凭百尺樓爲愛春風初侍坐欣逢海屋正添籌從茲介壽知無
極指日巖廊慶大猷

用悔

袁廷基

邑孝廉

倉粹成名已四旬半生自誤一沾巾軍門耻下孫吳率樂府空
懷李杜神當日武夫違士子至今文字識何人迴思世德家聲
好猶望嬰兒作席珍

光嶽樓春望

王不顯

邑貢生

巍巍獨鎮昔年樓此日登臨爽氣浮戶映赤霞驚塞雁窻含綠
水射沙鷗遙瞻晴雪基山迥俯澗松雲泮壁幽極日蒼茫無盡

處春光相望不勝收

友人邀賞牡丹和同席韻

張學朱

邑歲貢

信是春寒花較遲牡丹四月放新枝香居第一堪稱異豔更無雙果是奇情重故人能賦此感深如僕願隨之從叨盛會饒吟興恰獲同心助逸思

陸臬憲頒急救方命以詩和

葛世寬

邑拔貢

當年忠宣抄古方念念活人無已時由來上醫能醫國良相良醫道甯岐明德後裔達人多忠厚之長慈惠師藹藹神君尹般鬲保赤如傷日孜孜濟民仁壽葆元氣先時已沁人心脾携來廉憲青囊秘滾滾熱腸流在茲十全夙奉板輿訓又宣臬

德平縣志

卷十二

藝文

一一一

天成謙記南紙店代印
濟南城內芙蓉街路西

德達黔黎遙遙華胄本同派智圓行方一例施起死回生不轉瞬士給一册仔細窺并令諸生紀其事煌煌巨製煥鼎彝永為天地補缺陷行見天折盡耄期德邑自昔德星聚今日福星一路熙獨念文病救更急但恐士俗不可醫儻獲仙方換凡骨通閉解結暢淋漓伐毛洗髓金針度垂翅終能奮澠池得列忠宣龍虎榜參苓籠中添鼓皮

蓋節淵泛舟

六首之四

閻廷任

邑拔貢

蓋節淵頭雨乍收吟風弄月蕩輕舟停橈直在蘆花岸蛙自爭鳴水自流

蘭橈欸乃去悠悠一片波光帶月流耿耿銀河如可接乘槎猶

欲問牽牛

午夜流輝月漸低泛舟人醉小橋西青青柳色盈盈水打漿歸來路欲迷

橋南橋北一浚清載酒泳游最有情夜半醉歸人不見空餘西畔小舟橫

光嶽樓

閻廷任

光嶽高樓特地開鈎盤河繞此中迴憑欄試向南山望齊魯餘青撲面來

平昌八景

明永樂間司鐸年公富所定各賦七言律詩士大夫倡和之嘉靖趙公修志刪更其四國朝

癸酉陳公景琇易其五存其三邑人朱履慶又推廣易名而為十皆非實錄今於八景各志數首以存舊蹟仍

德平縣志

卷十二 藝文

一二

天成謙記南紙店代印濟南城內芙蓉街路西

摘其名尤雅者曰馬頰晴沙牙池新月數首附之

魁臺夕照一

層臺十二草萋萋太古人生是攝提遠樹參差歸鳥盡斷霞明滅夕陽低圖經不載無遺簡風俗猶傳有俊齷記得往年携酒處原頭一望白雲迷

年富

短垣矮塔半峻嶒千載臺空枉費登埋玉有靈稱鼻祖尋春無路問山僧雲虬正喜雷初動野馬遙看氣欲騰因果憑誰說得出嗅梅笑把石欄凭

都御史王綸

西風黃葉亂歸鴉大野荒荒日欲斜肯為有心憐赤子不教無術化丹砂休論鼻祖生民遠祇念孤臣去國賒短筵數聲驅犢

返臺前吹落盡梅花

沈志達

荒郊舊壘鬱崔巍繫馬登臨首重回何地星文占太史有人客
路上魁臺平原斗酒旗亭遠大野西風落日哀海國蒼茫頻極
日彩雲飛處是蓬萊

明經白銘武進

超然高寄地天空無數風光散晚紅落日餘霞勻彩艷荒臺舊
壘結春融登臨興溢斜陽外瞻仰情依曲徑中卓錫千年稱勝
事遙知今古賞心同

袁廷基

基山晴雪二

天女無端忽散花朝來吟眺玉峯斜晴雲冉冉留丹壑紅樹冷
冷映白沙絕塞雁鴻遲五夜荒原砧杵動千家濡毫欲草梁園

德平縣志

卷十二 藝文

一四

賦只恐寒光入鬢華

戴玉縉

天成謙記南紙店代印
濟南城內芙蓉街路西

朝來晴雪滿前溪蹇騎衝寒過嶺西凍合玉樓愁白屋光搖銀
海失青齊梅花不到江南信客路應穿東郭鞦只合袁安高臥

穩却緣訪戴漫留題

時客德令戴
紳黃署中

白銘

凌寒西過野人家林外岡巒竦處斜旭日漸騰明玉壘朔風輕
拂走銀沙數株柏影留空翠一派晶光射早霞莫是雪山煉真
處欲尋覺路問曇華

朱履慶

平昌春雨

朝來雲霧踏平昌花雨霏微入坐香鬪草兒童閒結侶扶犁父
老自耕荒麥苗勃勃迷青野柳絮依依落舊隍酌罷神功無一

事相將鼓腹樂羲皇

年富

般城秋月 四

漢家龍馭立般城城廢名存蔓草生幾處笙歌分月色一天砧
杵報秋聲斧侵丹桂飄香霧曲按霓裳鬱舊情涼露滿襟成獨
坐幾回呼酒欲騎鯨

邑令周廣

一輪皓月漾秋空獨上高臺聽斷鴻野戍峯烟搖畫角盤城樹
色老青楓梯雲無計窺銀魄斫桂何年到玉宮把酒臨風無限
意升沉還欲問嚴翁

李圖南 邑孝廉

當年高國古般城只有秦時片月明薜荔寒生清露重蘆笳夜
靜暮烟平尋源有路仙槎遠斫桂何人玉斧輕此際悲秋無限

德平縣志

卷十二 藝文

一五

天成謙記南紙店代印
濟南城內芙蓉街路西

意不堪孤枕柝三更

白銘

古塔昏鴉 五

浮圖聳處與雲齊舍利光寒入望迷風力漸消簷馬靜月明遲
上夜烏啼數聲驚噪殘霞外幾度飛歸積水西我欲凌空遊八
極擬憑顛際作丹梯

年富

翠嶽浮圖礙紫霞佛光閃爍動金鴉玉峯倒瀉寒溪靜鐵柱高
懸碧落斜塵蹟尙留麋鹿鎮劫灰已冷楚王家遙思昔日檀那
盛鍾磬泠泠課法華

邑令周廣

嵯峨古塔仰光華隔院黃昏噪暮鴉月牖低徊添黯淡風鈴宛
轉助喧譁數家站杵青燈燦滿樹金莖瑞露加爲向上方窺夜

色飄然物外現雲霞

鄧青雲

福建
孝廉

龍泉曉鐘 六

梵宮高廠轟般陽向曉鐘聲破夜涼玉漏乍殘敲送閣金風微
動冷呼霜穿雲遠近飄空際乘月依稀出上方伏枕驚回清夢
斷一時逸興寄滄浪

年 富

殘星幾點遠孤城出寺鳴鐘報五更滿院蒲牢雲外濕數村篝
火夢中驚泉流激玉凌朝旭露滴含珠冷雁聲莫道閣黎無雅
事碧紗籠處有芳名

鄒揚休

福建
孝廉

絲堤芳草 七

望斷王孫淚已收空餘芳草自清幽平成若不歸神器郊廟安

德平縣志

卷十一 藝文

一六

天成謙記南紙店代印

濟南城內芙蓉街路西

能饗白頭飛絮亂紅傷往事雕鞍碧輦醉春遊欲窮千古興亡
恨惟有堤邊剩水流

周 廣

一路青青送客鞭堤名還似帝堯年土花疑化黃熊血隴樹遙
分白屋烟自古榮枯同腐草幾人俎豆配皇天只今憑弔懷明
德遊子行吟思黯然

白 銘

千年景物總成非爛盡雲根草尙肥雨濕女蘿山鬼嘯風飄大
野羽翼歸濃連宿霧迷樵徑翠澗晴光上客衣玉帛塗山明德
遠只今憑弔一歎歎

戴王縉

重平烟柳 八

迢遞平城遠碧叢東風一氣暖冲融烟光黯淡連荒郭柳色蒼

茫接遠空雉堞半摧青草外人家多住綠陰中隔溪貫得新
酒乘興重來賦落紅

年富

垂垂楊柳舞腰輕長日烟籠壓故城翠黛偏宜殘月曉淡痕常
伴夜鐘清三眠帶雨輕綃織幾縷隨風媚眼明驀地驚濤來四
野九龍歸去變松聲

沈志達

誰向東風解百憂迷離總入望中收河陽昔是花爲縣海域今
疑柳作州里飲三杯新社長春衫半臂舊般侯肩輿暫向濃陰
息敢謂他年蔽芾留

邑令陳景琇

馬頰晴沙

曾聞泲水勢懷甕軾遺踪溯杳茫自昔九河稱馬頰於今一

德平縣志

卷十一 藝文

一七

天成謙記南紙店代印
濟南城內芙蓉街路西

逕遶羊腸雨餘沙淺金成礫風起塵多土作岡滄海桑田經幾

許神功千載總堪傷

曾一侗

陳州人

策蹇來尋柳外華長堤空翠隔烟霞雲間樹色隨波轉浪裡鷗
浮向日斜流水聲中聞鳥奏平波影裡見人家前村應有高風
在十里晴風映碧沙

盧履謙

長河一帶隔桃花十里晴光十里沙覓婦鳩呼流水外揀金人
去夕陽斜沿堤路淨無泥滓傍岸村深有酒家坐看理竿垂釣
者高情渺渺寄烟霞

孫體震

邑生 增

牙池新月

不盡清華望裏收牙池斜掛月如鈎一痕初瀉纖纖影半璧猶

含點點秋夜色未迷青嶂樹晴光欲透碧雲樓臨流我獨懷幽
賞河漢空蒼萬古悠

邑令 鍾大受

泮池半壁古來傳池以牙名境倍鮮正喜地中雙曲現兼逢雲
外一鈎懸依稀新月連殘月彷彿上弦接下弦極目高卑同一
象無邊風景自年年

周景泮 邑廩 貢

西風取次入華池半壁纖光掛遠枝寶匣乍開全魄彩晚粧初
上一痕眉遊魚照影防鈎誤棲鳥窺林避射移耿耿銀河曙色
色水晶宮畔欲迷離

金亮采 邑廩 生

石齒磷磷砌白牙徽流寶鏡尙全遮蛾眉縹緲先描畫桂影婆
娑未着花認是遺珠從水隱翻疑殘魄入簾斜清華應有團圓

德平縣志

卷十二 藝文

一八

天成謙記南紙店代印 濟南城內芙蓉街路西

候一片祥光望裏賒

戚世元 邑歲 貢

詩詞下

明

同升歌次陸鵬峯韻

補

武英殿
中書

郭

諶邑人

山林不識賢良詔魂夢何曾戀廊廟自歎虞卿著書老豈同方
 朔金門召憶昔蓬蒿滯我曹十年書劍誤青袍金鞭信馬遊齊
 魯瓊樓臥月醺斗醪北山豈是索高價幽居未應堪圖畫海濱
 荒涼不可留願肯耕織老其下四方弧矢眞丈夫朝發崑崙夕
 蓬壺魯連談笑下燕將鴟夷指顧無姑蘇經濟何勞用詞賦青
 雲歷歷皆賢路負擔躡屨走長安欲獻謀謨寫疇素士龍聲價
 玉壺水伯英草聖非虛稱五常白眉世已重北海柔翰誰能爭
 德平縣志

卷十二 藝文

一

天咸謙記南紙店代印
 濟南城內芙蓉街路西

嗟余賦性苦遲鈍鹽驥池蛟久厄困京華傾蓋如故知交誼淺
 深詎復論勢利相忘道義交盍簪麗澤藹春溫百里遙看德星
 聚一時爭羨登龍門冠裳濟濟輝尊俎獨慚老婦拓拔舞酒酣
 氣振海岳吞高談四座虹蜺吐街頭試聽銅狄歌狂客風流逸
 興多及時得歡不作樂紅日無那青山何立功立言古聖訓麟
 閣雲臺非我分秘省從容歲月深莫將鱗次比年運平生蹤跡
 各山谿四海襟期聚首齊今宵共飲對燈燭明朝騎馬聽曉雞
 玉山莫向金尊倒始終還須敦舊好勉旃努力效前修令名夙
 夜期長保

題西山漫興圖

山根留野酌靈泉吐其竇欹石弄潺湲響切笙竽奏迴波逗錦
沙射日貫星宿把酒下深碧行杯逐飛溜鳥過晚溪馴樹夾春
津茂夙懷愜眺賞幽思窮昏晝醉偶踏層岡芙蓉亂羣岫
佛寺西林勝人家亂石巔面溪開水閣逐嶺布山田磬自雲中
出僧從樹杪穿江湖興何限俱落酒杯前
梯石凌高漢攀蘿上紫峯雄臺須縱飲丹壑幾相從樹鳥看垂
帽山雲出蕩胸翻嫌聲利客同此寄高蹤

國朝

登廣教寺浮圖

葛周玉

祇園有高塔矗立浮雲齊行空礙白日霞繞東復西振衣盤道

德平縣志

卷十一 藝文

一一

天成謙記南紙店代印
濟南城內芙蓉街路西

閒步步凌天梯一磴一回盼摩挲碧琉璃眼開萬慮豁倏然發
蒙翳俯視衆山小四圍天亦低下聞呶啞聲都是高鳥啼憶昔
岑南陽手向慈恩攜亦有李青蓮西靈獨攀躋我來最高頂擲
管亦一題題罷起長嘯半空落虹霓蛟龍窟中藏震動青青谿
古柏
閣翥鵬
邑翰
盤根錯節幾冰霜古柏亭亭立夕陽萬壑風濤秋入韻千年琥
珀夜騰芒非支大厦材難用不出深山壽更長畢竟天家梁棟
器何容久臥白雲鄉

楊花曲

任邱道上作
六首之二

楊花繞路各西東半送流雲半逐風管盡人閒離別苦自家離

別又匆匆

江南江北路迢遙一片春痕澹澹描飛上灞橋驢子背行人誤認雪花飄

攝篆德平感事述懷即以留別七首 邑令 沈 淮 台 簪

聽鼓來齊州四稔流光速去冬之平昌半載竊微祿才無襪線長盟心矢幽獨衙齋小於舟打頭三閒屋古槐蔭階除陰深窗戶綠怡顏盼庭柯生意暢然足撫茲良木良慎勿本根劇

井田既云廢旱潦亦不均地勢既窪下淫雨橫流奔或藉鄰為壑爭奪復紛紛鉤盤與馬頰故道久淤湮積重勢難反疏濬非經旬坐視苦無策慚愧撫斯民惟期雨暘調田疇懇喁喁天功

德平縣志 卷十二 藝文 三 天成謙記南紙店代印 濟南城內芙蓉街路西

雖可恃人力尤宜勤鄭家坊民有爭水道者下車後為之疏濬

士貴先器識而後及文藝崇實必黜華明道復正誼相將五百人春風及小試趨向或不同盍各言爾志縣試童生五百人亦各言其志也曰暮

春者命題 瑕瑜亦互見當佐經術氣敬業開講堂風雨苔生砌已將傾圮 明師貴自擇春秋堪習肄植根既堅深自能絕流弊母徒

弄刀筆思遷因見異勗哉青雲梯無以儒為戲

冬去夏已來為時雖未久瓜期既云及息肩謝塵綬金穀須料量案牘勞分割行吾力所能毋為後人咎殷勤諸父老祖餞一杯酒離筵不成醉此意良自厚願爾為善良士農分各守行矣

勿復顧離情繫垂柳愧無善政施捫心呼負負

德平道中

雪泥鴻爪記前緣重到平昌思惘然己丑冬曾攝縣篆豈有甘棠留舊澤忽聽爆竹感殘年廢河白擁沙痕厚孤墻紅縣日影偏惆悵勞薪猶未息鷗閒我羨小神仙

偶成 二首

邑令楊澤閏 石泐

蓬山風力困飛騰作賦登高我尙能人謂龐才非百里家傳鱣兆有三升馬來冀北空羣少徑笑終南捷足登袍笏敢嗤爲俗物當年拜石折腰曾

小住紅塵閱歲華漚汀鷺渚足生涯湖山爲我添詩料風月隨人到酒家清浪暗移三里權綠蘿閒映一庭花何時徑署煙波

德平縣志

卷十一 藝文

四

叟蓑笠相邀泛釣槎

餞楊石泐邑侯南旋

李同楠 邑貢生

豔語當年卻暮金家傳清白到於今衙前喜蔭陶公柳堂上欣聽宓子琴惟濟民生深有願除培土習更無心花封桃李行將遍不減甘棠一路陰

征輪無計得遮攀驛路蕭蕭馬去閑離恨時繁花鳥外吟情定逐水雲閒茫茫宦海抽身出落落芳蹤何日還無數蒼生齊額手休常高臥戀東山

遊臺子寺

孔昭珩

微陰掩映日光妍疎磬淡煙景灑然雲影無心來古刹雪花有

天成謙記南紙店代印
濟南城內芙蓉街路西

意媚諸天僧能愛客原非俗境足留人已
是仙到此惟將詩獻佛塵蹤可許暫參禪

馬頰晚眺

沈寥天氣綠溪頭此日登臨豁達眸斷岸千尋銜落日平沙萬里入清秋蕭蕭蘆荻連村隴漠漠雲煙點鷺鷗疏鑿當年遺蹟在逝川浩渺自東流

馮邑侯子延倡捐書院紀事

李法中

邵庠生

平昌百里暫棲身闔邑咸霑化雨新自是片言能折獄從教基月展經綸卻金清思餘黃鶴振鐸儒風起白麟何幸公門今得地行看桃李蔭成春

德平縣志

卷十二 藝文

五

天成謙記南紙店代印
濟南城內芙蓉街路西

論學

五首之二

學問事如何本爲化氣質於此能了悟撥雲見天日
讀書志聖賢夫豈別有術但能返此心無適常主一

早起

早起肅衣履澄心默觀理寸衷嚴厥微一日謹其始習習曉天風勢將終暴矣涓涓山下泉流貫漢江水道通天地外存省祇如此所以古聖賢時時敬無已

洪蘭楫邑侯新任紀事

李同楠

昨聞握篆駐行旌風色攜來兩袖清祇有琴書充宦橐從無案牘鬱民情公私共說關防密利弊周知檢察精此地羣黎方待

澤好將霖雨潤蒼生

沙河晚步

閒來馬頰步長隄兩岸垂楊一帶齊
月印川流光破碎風吹沙捲影離迷
迢迢村落孤燈閃隱隱荒城故址低
疏鑿功高明德遠探源原自火敦西

遊古鬲城

邱縣教諭 孫希适 邑人

萬國會塗山建都古鬲設夏室肆權奸
后緡厲志節逃出緣竇中奔來幾傾跌
邁迹生少康祖宗延餘烈創業田一成
中興計勇決誘豷兼謀澆奸雄勢全折
恢復舊江山重綿夏瓜瓞臣靡功居多
吾民力頌頡到此四千年幾番冰雨雪
五霸蹤渺茫更

德平縣志

卷十二

藝文

六

天成課記南紙店代印
濟南城內芙蓉街路西

何論滕薛舊壘尙森嚴輪囷環堵列馬道
草芳菲將臺松蟠結鴉點梳妝樓色香
羨明潔夜雨逢新晴朝陽半明滅城闕
現空中樓臺影高揭人馬爭往來畫圖豁
眼纈空谷金玉音塲駒難羈繼若即仍若
離回旋只一瞥此蓋川嶽靈菁華久自泄
因見天地心風雲護常切好雨潤於脂斜
陽鑄似鐵豐年雨澤多四圍水漂漱遠近
勢猶龍都歸城海穴西北兩條河順流妙
剔抉馬頰承上游去來脉貫徹攬勝久盤桓
中心自怡悅地濶界分明天高勢負絕白鳥
穿林飛野人佳話說雲物景猶新風光望
不竭欲去首重回情終未忍別

祈雨

芸芸此黔首營營此餬口春耕入夏耘努力勤農畝年穀幸順
成乃可獲升斗上以奉君公下以養父母柰何徂夏初雨澤數
不偶如火燎於原苗生難持久舉國羣若狂衆穉狂且走跪禱
明神前傾倒一杯酒朝夕鳴鼓鐘壇墀插楊柳官民並謁誠精
意達高厚油然起祥雲甘霖沛隴右簿困良苗甦大德羣生受
餉熟除呼庚釀甘預問酉報賽答神功秋冬獻羔酒蒸成太古
風含飴童與叟

酬周邑侯敏卿

四首之二

孔昭珩

藉甚循聲冠二東春臺夏屋庇人同牛刀小試武城化犢劍全
移渤海風樂事頻聞傳父老歡心徧播到兒童轡軒採取龔黃
德平縣志 卷十一 藝文 七
績盡在口碑輿頌中

天成謙記南紙店代印
濟南城內芙蓉街路西

郎官列宿應星文福曜高懸齊趙分花縣風流聞北闕琴堂

歌詠擬南薰鯨波幸免疏排苦

時議縣境濬河賴公詳免

雉堞常留保障勳

城垣久圯公倡衆捐修

更有廉威能鎮物邠州法肅郭家軍

縣駐兵巡防公能裁之以

法

恭輓 忠親王

李敬修

邑孝廉

侃起幽燕地英雄迴異常乾坤鍾閒氣日月沐精光部屬兼蒙
古威名震朔方上賓開幕府貴戚重椒房不憚風塵苦親臨戰
陣塲家鄉拋故國社稷保吾

皇在昔咸豐始蠢茲粵匪猖烽烟紛兩廣鞞鼓震三湘久治從

無備長驅勢甚昌赫然戎王是怒整旅扼其吭連鎮休金鼓滄
州靖沸蟾元戎蒙上賞

天子坐明堂洪首剛懸彙英夷又跳梁書詞何悖慢兵勢太猖
狂蔽日森旗戟乘風駕海航黔黎皆震恐

宵旰正徬徨慷慨 王師出威嚴

帝命將提兵探虎穴鏖戰奮鷹揚掣肘功難就班師志竟妨東
沽因失利北直亦驚惶和議誰當 國 王師遂出疆誓江祖
生壯拜表孔明傷十萬人磨劍三千士裹糧蒼上齊額手赤子
盡承筐湖北妖氛靖河南境宇康安民功莫大除暴志彌彰團
匪淄川起軍書羽檄忙移師旋撲滅大雨沛沱滂 王駕來山

德平縣志

卷十一 藝文

八

天成謙記南紙店代印
濟南城內芙蓉街路西

左黎民跪道旁輦車供糗草携手進壺漿孟飯昭芹獻草衣親
袞裳 王言吐綸綍溫語勗耕桑活佛供司馬遺蹤愛召棠誓
師期滅敵奏凱早還鄉淄水方清肅曹州復跳踉據圍多虎豹
當道有豺狼包麓連營寨沿河戰鼓鏗勢分烏合象社結白蓮
香 王乃勃然怒誓將除彼殃妖魔期掃盪鬼域尙潛藏山岳
軍難撼雷霆氣自昂摧鋒人踴躍奪纛敵周憚赦從開生路殲
魁杜亂倡連番擣巢穴百戰挫鋒銳荷澤氛猶熾螳螂臂敢當
去來踪不定聚散勢難防帥府思招撫亡徒敢恃強環攻持蚌
鷁屠滅惜崑岡厓慮憂方大征車息不遑但期登衽席不計缺
錡折五月瀘同渡三過禹等量一身關治亂十載閱星霜櫪馬

三更警星流五丈芒出師猶未捷皓首竟先戕億姓同揮淚
兩宮親臨喪忠魂依

帝座熱血灑疆場大敵誰攻討長城誰保障有心追李郭無命
痛關張左袒心同切南征恨共長普天皆縞素率土盡悲愴聞
道義旗起行看寇虜攘復讎抒 國憤雪恥慰忠良大節昭終
古精忠愬上蒼鼎彝銘武烈俎豆薦明彞 王昔猶生在民先
致禱禳神人理奚異生死論何嘗向使居藩服依然佩玉璫春
秋修貢獻富貴飫膏粱娛老聽絲竹充庭列嬪嬙諸藩雖愛戴
九土詎瞻望磊落辭宮殿威揚莅陣行丈夫原有志世道讓誰
匡勇略三軍冠忠勤百鍊鋼安危係元老叔季振

德平縣志

卷十二 藝文

九

天成識記南紙店代印
濟南城內芙蓉街路西

皇綱 王自扶搖去民將報賽償山河留壯氣草木被餘芳竹
帛書難盡謳歌德不忘追蹤曹武惠媲美李文襄螭負豐碑轟
麟題特筆章昭然垂萬古赫赫一 忠王

白麟書院偶成

黑中孚

邑貢生

桃李公門何處尋斯文從此度金鍼幾人不負栽培意多士羣
懷踴躍心百十爲朋排玉筍萬千闢厦兆瓊林青雲指顧皆賢
路展卷揮毫奏雅音

節婦詞

典史 熊裕棠

獨凜孤芳塵不染明詩習禮堅貞勤家教子兩經營寒窗操井
白雪牖冷燈檠 一片冰心似水清柏舟彤管堪欽丸熊苦節

暑寒更芝蘭傳後代鳳綉燦銘旌

臨仙

登佛山即日次李吟舫韻

邑令周士瀚

巖頭四顧衆峰低繞足雲霞孰與齊萬竈炊煙城市隱一天秋色碧空迷山中說法石皆佛窗外聽經夜有雞遠影孤帆殘照裏河流直送鵲華西

道出德平元旦紀事

四首之二

兵部侍郎夏同善 浙江人

駢征除夕出平昌年矢行旌併一忙底事勾留成小住最難客

路遇同鄉

邑令周君和哉藉係浙江

採風聞說慶西成新迓祥霽喜又晴

是歲除夜得雪

莫笑縣城如斗大

家家爆竹帶歡聲

德平縣志

卷十一 藝文

一〇

天成謙記南紙店代印 濟南城內芙蓉街路西

平昌弔禰處士

平陰翰林翟化鵬 溟南

鼓吏當筵竟解衣英鋒容易蹈危機老瞞心膽三搥落季漢人才一鶚飛睠顧闕廷空薦表浮沈江夏愧知幾至今鸚鵡洲邊路芳草依然怨夕暉

秋日登光嶽樓柬李文止同年

高秋斜日此登臺砧杵聲清畫角哀齊魯青痕平野盡鈎盤河勢抱城來游郊誰見麒麟出落筆曾誇鸚鵡才且喜謫仙人不遠重陽好共掌中杯



